

تاریخ عثمانی انجمنی

مجموعہ سی

ایک آیدہ برنشر اولتور

مندرجات

علمدار مصطفیٰ پاشا (ما بعد)	افضل الدین
ایلیک التی پادشاہزک بروسہ دہ کائن تربہ لری	احمد توحید
یوسف نامی	صفوت
ایکنجی ویانہ سفری حقندہ	محمد عارف
سیواس سلطان قاضی برهان الدین نامنہ قیصریہ دہ بر کتابہ	خلیل ادہم
سلسلہ وقوعات دولت علیہ دہ ضبط ایندلیان ۱۴۲۱ سنہ سی حادثاتی	محمد عارف
متنوعہ: بلدرم سلطان بایزید خان اول دورندہ مصرہ	احمد توحید
سفارتلہ کوندریلن سفر شاہک و قانی	
مترقہ: قانوننامہ آل عثمان (ایکنجیسی)	محمد عارف

فیثانی ہ غروش

مرجی — باب عالی تاریخ عثمانی انجمنی

استانبول

محمد علی پاشا

مشیرین استانبول

۱۳۳۰

ایلك التی پادشاهمژك بروسه ده كائن تربه لری

بروسه شهرینك لطافت موقعیه سنی عثمانلیلرك نظرلرنده شرفلندیرن
برقیمت معنویه ده واردركه اوده ایلك التی پادشاهمژك مراقدی بوبله
دل آراده بولونماسیدر .

تربه عثمان غازی

نام مبارک نه نسبتله مباحی اولدیغنز برنجی پادشاهمژ عثمان غازی حضرتلرینك
تربه منیفه سی بروسه حصاری ایچنده الیوم طوبیخانه دنیلن موقعه ده كاشدر
حال حاضرلی سلطان عبدالعزیزخان طرفندن مجدداً یاپدیرلمش ساده برینادر
حالبوکه تربه مذکوره نك بنای قدیمی كوشلی قبه نامیله معروف اولوب
بروسه نك مبانی نقیسه سندن ایدی . ۱۲۷۱ سنه سنده وقوعه كلن زلزله
عظیمه ده منهدم اولغله ۱۲۸۰ ده یكیدن یاپلمشدر . بنای قدیمك ترمیقانی
شارل تكسیه نك [۱] كوچك اسیا نام فرانسیزجه اثرنده محرردر .
تربه نك قپوسنده منظومه آتیه بهر سطرده ایکی بیت اولمق اوزره
اوج سطرده محرردر :

مفخر عثمانیان ظل الله العالمین	حضرت عبدالعزیز اول پادشاه بحر وبر
سایه سنده اولدی هب معمر ملك ودولتی	مقدمیله بوله لی جای خلافت زیب وفر
جدبا کی حضرت عثمان غازی تربه سن	قیلیدی احیا یاپدیروب اول شاه فاروق السیر
نامه یاپوب نشان قبرینه تعلیق ایلیدی	هیچ میسر اولدی برشاهه بوبالا اثر
روضه جتنده یارب جدی قیلدجه خرام	اوله تحت سلطنت اول شاه ذیشانه مقر
مهملدن چاگری نورس دیدی تاریخی	تربه عثمان غازی اولدی پرنور سرتسر
کته المولوی زکی دده غفرله	سنه ۱۲۸۰

تربه دروننده برنجی صیره ده یدی وایکنجی صیره ده اون که جمماً

[1] Charles: Texier Asie-Mineure p. 130 Paris 1862

اون یدی قبر موجوددر عثمان غازی مرقدی برنجی صیرہ نک وسطده
کائن اولوب صدقله مزین یر پارمقلقله محاطدر . صندوقه پوشیده سنک
باش اوجنده اوج سطرده :

(۱) مطلع شمس خلافت ملمع انوار سلطنت جدا جدا سلاطین
هایون عنوان بانئ یکانه تختگاه شوکت وشان
(۲) السلطان الغازی ابوالفتوحات والمغازی عثمان خان اسکنه الله تعالی
محبوحه الجنان حضرتلری

۳) ولادت	ظهور	مدت سلطنت	مدت عمر	وفات	نمقہ
۶۵۶	۶۹۹	۲۷	۶۹	۷۲۶	عبدالفتاح
سنه	سنه	سنه	سنه	سنه	سرسکه کنان

قبودن ایچرو کیرنجہ برنجی قبرده شمدی لوحه یوقدر . روایتہ
نظراً سلطان مراد خان اولک مخدومی ساوجبی بک اولدیفنه دائر موجود
لوحه خاقان مخلوعک اراده سیله بر قاج سنه اول بر کیجه یرندن آلدیرلمش .
ایکنجی قبرده ده لوحه اولمادیقندن صاحبی مجهولدر . اوچنجی قبرده عثمان
غازینک مخدومی علاءالدین پاشا مدفون اولدیفنی مبین قطعہ آتیه بی حاوی
بر لوحه موجوددر :

بو فرزند عثمان خان هم دستور والادر
خلافت نوبتن اورخانه ویرمش ترکدنیادر
اسن سن ایکن حقہ کچوب تخت خلافتندن
جهانک نقشه آلدانیمان بر مراد دانادر
بر رکین دادریدر ذاتی اورخان غازینک
وزیر وقت عثمان خان علاءالدین پاشادر

دردنجی قبر حضرت عثمان غازینک مرقدیدر .

بشنجی قبرک صاحبی ده مجهولدر .

آلتنجی قبرده غنوده اولان شهزاده حضرت سلطان اورخان، ابراهیم

شهزاده اولدیفنی شو قطعہ بیان اییدیور :

ایلك التی بادشاهمژك بروسه ده كائن تر به لری ۹۷۹

بوده فرزند اورخان خان خلقدر جد اجماده
اولوردی وقت مرهوننده شه بر موجب عاده
نه چاره حکم و تقدیر الی بویله در حیفا
او ذات پر مکارم ایرمدی مقصوده دنیاچه
براقدی مادرین ماعله کوچدی دار عقبایه
اجل کلدی درینا کیتدی ابراهیم شهزاده

یدنجی قبر سلطان اورخان غازینك زوجته سی وشهزاده ابراهیمك
والده سی اسپورچه خاتون مدفیندر . باشنده کی لوحه ده :

در دریای عصمت زوجة سلطان اورخاندر
نشین مستد محرم سرا سلطان ذیشاندر
سوردی مقتضای شفقتی شهزاده سن غایت
النندن کیده لی فرزند ابراهیمه کر یاندر
دوشوب فرزندینك آردینه کیتدی روضه خلده
او ماعله کیدن عقبایه بو اسپورچه سلطاندر .

قطمه سی محرردر .

ایکنجی صیره ده کی اون قبرك هیچ برنده لوحه ویازی اولمادیقندن
مدفونلرك اسماری مجهولدر .

سلطان عبدالعزیز خان طرفندن تأسیس اولنان نشان عثمانی نك
برقطعه مرصعه سی سلطان مشارالیه بالذات کتیروب تر به یه تعلیق ایلدیکنی
میین فؤاد باشانك :

بونشانی حضرت عثمان غازی نامنه
نجلی خان عبدالعزیز اجماد و تأسیس ایلدی
وضع و تعلیق ایلیوب کندو الیه قبرینه
شان روح جدی اعلا و تقدیس ایلدی .

قطمه سی غایت ساده برلوحه اوله رق تر به داخلنده معلقدر .

صدراعظم صقوللی محمد باشانك تر به عثمان غازی یه وقف ایلتدیکی ایکی
قطمه خطی ، جلدی ، تذهیبی نفیس کلام قدیمدن بری محمد بن حسین الکاشانی نك
خطیله ۹۶۹ سنه سی جادی الاخرنده یازلمش اولوب دیکری ۹۷۲ سنه سنده
یازلدینی تاریخندن اکلالمقدمه ایسه ده خطاطی اسمنی یازمامشدر .

بروسہ یہ تشریف شاہانہ لرنده طرف اشرف پادشاہیدن جداعلالری
 تربہ سنہ بر پارچہ شال ایله فریقاندن ابراہیم پاشا خطیلہ ۱۲۸۹ تاریخی
 اورتہ قطعہ ده بر حلیہ شریف ویساری زاده خطیلہ ۱۲۶۰ تاریخی و :

دوجہانک کوئی برج سعادتہ ایکن

والدینہ نیچہ ویرمیہ مولا شرفی

چشم عرفان ایله برکز نظرایت غواصہ

الیجق درینی یابانہ اتاری صدق

قطعہ سنی حاوی لوحہ ہدیہ بیورلشدر . دیگر سلاطین عظام
 تربہ لرنی ده ہدیہ ملوکانہ لرندن حصہ دار بیورمشردر .

تربہ سلطان اورخان غازی

کوک عثمان غازی حضرتلرینک کرک اورخان غازی حضرتلرینک
 تربہ لری بروسہ حصارندہ واسع بر بانچہ درونندہ اولوب بر برینہ پک
 قریبدر . بوبانچہ نک موقعی لطیف واوویہ منظرہ می شیریندر . ساعت
 قلعہ سی بورایہ آروچہ زینت ویرمکدہ در .

ایام مبارکہ ورسیمدہ آتیلان طوپلر ساعت قلعہ سی قربندہ اولدیفنندن
 اہالی بورایہ طوپخانہ نامی ویرمکدہ در .

اورخان غازی تربہ سی دە ۱۲۷۱ زلزله سندہ خراب اولمقلہ یکیدن یاپلش
 ایسہدہ بر کتابہ قونماشدر . ذاتاً تربہ نک خارجی وداخلی پک سادہ در .
 درون تربہ دە یکرمی بر قبر وارددر . قبودن کیرنجہ برنجی صیرہ دە کی
 اوچنجی مزار حضرت سلطان اورخان غازی در .

ایکنجی مزارده مدفون اولان علمیلہ خاندان سلطنت عثمانیہ دە
 مشار بالبنان سلطان قورقود بن سلطان بایزید خان ثانی در .
 ایکنجی صیرہ دە کی برنجی قبر شہزادہ قاسم بن سلطان اورخان غازی
 مرقدیدر .

دیگر قبرلرده لوحہ کورہ مہدم .

تربۀ حضرت سلطان اورخان غازیده صقولی محمد پاشا وقی اوله رق
اجزاء شریفه قرآن کریم وارد .

مؤسس بنیان دولت عثمان غازی حضرت تارینك تربه سنه متصل بر
صیره ده طقوز قبر موجود در كه و قبیله آبروجه برقبه آلتده ایكن زلزله دن
صوكره تربه یایلمیه رق آچقده قالمش لر در . بونلردن اورته ده کی بیوك
قبر زوجه سلطان اورخان غازی نیلوفر خاتون اولدینی روایت اولنیور .
عثمان غازی تربه سنك قبله جهتنده باغچه ده سلطان مصطفی خان ثانی
وسلطان احمد خان ثالث دورلرنده ایکی دفعه شیخ الاسلام اولمش اولان امام
سلطانی محمد افندی متواری خاك غفراندر كتابه سنك مزارای شویله در:

ادیب دهر محمد افندیكم اولدر
امام اهل ورع پیشوای صف فحول
دوباره مسند فتوایی ایلیوب تشریف
بنان فکر ایله حل ابتدی عقده مشول
شعاع فضل جهانی ایدر ایكن بر نور
دریغ ابتدی همان افتاب عمری افول
پوستگنای فنایه وداع ایدوب روحی
فضای عالم قدس خطیره ابتدی دخول
قصورنیم عفو ایله ایلیوب شسته
ایده عبادت شبکیرنی خدا مقبول
رسم خاطره تاریخی دوشدی بالهام
نعم ایچره محمد افندی ابتدی نزول

سنه ۱۱۴۱

شیخ الاسلام مشارالیهك ترجمه حالی « دوحه المشایخ » ك ۷۸ و ۷۹
نجی صحیفه لرنده در .

مشارالیهدن ماعدا بروسه ده شیخ الاسلاملردن محمد شمس الدین القناری ،
ملا خسرو محمد ، عبدالقادر چلبی الحمیدی ، قره چلبی زاده عبدالعزیزه
مسعود ، اسیری محمد و قره خلیل افندی زاده محمد سعید و صالح افندی
زاده محمد امین افندیلر مدفوندرلر .
احمد توحید